



PROGRAMA MONITORIZASAUN SISTEMA JUDISIÁL

Rua setubal Colmera Dili, Timor Leste
Po Box 275, Telefone: 3323883,
info@jsmp.minihub.org
www.jsmp.tl



A-N-T-I ALIANSA NASIONÁL TIMOR- LESTE BA TRIBUNÁL INTERNASIONÁL

Telephone:
77179655/77289241/77402231
e-mail: lanarra.del@gmail.com or
maubere_oan@yahoo.com or
moniz@jsmp.minihub.org

Deklaraun Konjunta

Loron Internasional Direitu Vítima ba Lia los no Justisa:
ANTI Ejize Estadu Timor Leste
la-bele ignora vítima sira nia direitu



Loron 24 fulan Marsu nu'udar Ioron Internasional Direitu Vítima sira ba lia-loos no justisa.

Dedikasaun Ioron ne'e ba vítima violasaun direitu umanu sira nian deside husi Rezolusaun

Konsellu Direitu Umanus ONU Nú. A/HRC/Res/14/7 iha tinan 2010 liu-ba.

Razaun no konsiderasaun Konsellu Direitu Umanus deside Ioron ne'e hanesan Ioron istóriku hodi fo valorizasaun ba Oscar Arnulfo Romero hanesan Bispo husi El Salvador ne'ebé ho nia dedikasaun, apoiu, brani no oferese nia vida tomak hodi luta no defende direitu vítima violasaun direitu umanu no ikus mai iha Ioron ne'e nia tenke mate tanba hetan oho. Tanba ne'e Nasoens Unidas konsidera no hili Ioron ne'e hanesan Ioron Internasional direitu vítima sira nian ba lia loos no justisa.

Timor-Leste nu'udar membru foun ba komunidade internasional ka membru ONU ba dala-191, mos nu'udar "na'in" ba Ioron ida ne'e, liu-liu tan Timor-Leste nu'udar "país vítima" ba violasaun direitu umanu ne'ebé akontese durante tinan 24 okupasaun ilegal Rejime Soeharto Indonézia nian. Ne'e duni Timor-Leste mos iha dever moral atu selebra Ioron ne'e no ha'klaken ninian ispiritu hodi vítima sira nia direitu ba Lia-loos no justisa bele la'o ba oin, nune'e mos hanesan lisaun hodi bele "hanorin" jerasaun foun atu labele halo tan ema seluk sai vítima violasaun direitu umanus.

Ezijensia ba direitu vítima violasaun direitu umanu ba lia-loos no justisa, la'os de'it atu satisfas esclusivamente vítima sira de'it, maibé mos jerasaun agora no futuru. Lia-loos ne'e nu'udar patrimoniu (riku-soin) históriku nasaun ida ne'ebé hakarak lao ba hodi la repete tan hanesan saida mak akontese iha pasadu. História la'os de'it kona-ba eroismu iha rezistensia ne'ebé nakonu ho aktu violénsia, maibé mos tenki abranje sofrimentu

vítima sira, hodi nune'e ita aprende oinsa ema nian terus hodi la halo tan ema seluk sai terus.

"Lia-loos tenki deskobre, aprende no habelar ba jerasaun agora no futuru. Ne'e duni, ita lalika tauk atu deskobre lia-loos no rekoñese ita nian pasadu ne'ebé "nakukun" no buka "falun-metin" ho pasadu eroismu de'it. Ita tenki onestu atu simu ita-nia pasadu hotu, hodi ita aprende atu ha'dook-a'an husi hahalok "loko-a'an"; dehan Vice Presidente Asosiasaun Vítima Nasionál Timor Leste, Sra. Maria da Gloria.

Nune'e mós direitu ba justisa, la'os de'it interesse esklusivamente violasaun direitu umanu sira nian de'it. Justisa ne'e nesesidade kriatura humana iha sa tempu de'it. Agora ita hotu mos sei "hambrok ba justisa" nomos jerasaun futuru sei nesesita direitu ne'e mos.

Se ita laiha korajen atu hala'o justisa ba pasadu, maka impossivel mos itania Estado bele hala'o ninian obrigasaun atu fornese justisa ba kazu sira atual nomos futuru (korupsaun, abuzu podér, violénsia domestika, ..sst).

*"Prinsipi justisa ne'e tenki kaer metin no labele "**selok tun-sae**" tuir gostu "elite" ka liuliu podér suspeitu sira. Problema laiha kbiit atu realiza justisa, la'os razaun atu ignora no viola prinsipi ne'e. Kbiit atu realiza ne'e relativu no kompete ba obrigasaun membru komunidade internasional hotu; dehan Sisto dos Santos, Koordenador Board ANTI*

Komemorasaun loron ne'e atu hanoin hikas no fanu konsiensia lideransa estado hotu kona-ba importansia Estado-memburu sira (inklui Timor-Leste no Indonézia) ba sira nia obrigasaun atu foti medidas hodi fornese vítima violasaun direitu umanu sira nia direitu ba lia-loos no justisa.

Tanba ne'e, ami ne'ebé hamahan an iha Aliansa Nasionál Timor Leste ba



Tribunál Internasional (ANTI)
hamutuk ho vítima no familia vítima ejize ba:

1. Parlamentu Nasionál atu kumpri sira nia dever konstitusionál hodi halo políтика no lejislasaun hodi nune'e Estadu Timor-Leste bele realiza ninia obrigasaun ba vítima sira ne'ebé mos nu'udar sidadaun timorense nian direitu ba lia-loos no justisa;
2. Husu ba Parlamentu Nasionál atu reajenda prosesu lejislasaun ba projetu lei Programa Reparação no Instituto de Memoria ne'e nu'udar medida nesesáriu atu realiza obrigasaun Estadu nian hodi valoriza vítima sira nia sofrimentu ne'ebé seidauk iha solusaun, iha segunda Lejislatura, asuntu Veterano sai hanesan agenda prioridade no konsege iha solusaun tanba ne'e ami laran metin iha lejislatura agora sei fo prioridade ba asuntu vítima;
3. Husu ba Estadu Timor-Leste atu asina no ratifika Konvensaun Internasional ba Ema Lakon Forsadu atu bele fasilita repatriasaun ba timoroan sira ne'ebé militár Indonéziu lori halai ba Indonézia durante okupasaun Indonéziu;
4. Husu ba Governu Timor-Leste hodi haree no kumpri memorandu entendimentu ne'ebé asina entre Governu Timor Leste no Indonézia kona-ba rekomendasau KVA nian liliu hari'i Komisaun Ema Lakon atu buka tuir Timor oan sira ne'ebé lakon forsada durante okupasaun Indonézia nian.
5. Husu ba komunidade internacional liu-liu Konsellu

Seguransa ONU atu labele husik nia responsabilidade ba prosesu krime kontra umanidade ne'ebé akontese iha Timor-Leste iha tempu pasado nune'e bele hakotu korenti impunidade iha Timor-Leste no rai seluk.

6. Husu apoiu solidaridade organizasaun internasional hanesan Amnesty International, ETAN, Forum Asia, AFAD, ICTJ, TAPOL, ICG hodi kontinua luta no halo advokasia ba krime kontra umanidade iha Timor-Leste ne'ebé ONU totalmente falla atu rezolve.

Dili, 22 de Marsu 2013

Aliansa Nasionál Timor Leste ba Tribunál Internasional (ANTI)

1. Komite 12 de Novemburu
2. Asosiasaun Vítima Timor Leste
3. Asosiasaun HAK
4. Judicial System Monitoring Program (JSMP)
5. ACbit (Asosiasaun Chega ba Ita)
6. Sekretariadu FONGTIL
7. Asia Justice And Rights (AJAR) Timor Leste
8. Front Mahasiswa Timor-Leste (FMTL)
9. MDI (Mata Dalan Institut)
10. Haberan Institut
11. KSI (Kadalak Solimutu Institut)
12. Ita Ba Paz
13. Fokupers
14. CDI
15. KBH (Knua Buka Hatene)

“Informasaun edukativu kona-ba papel juis nian”

Informasaun hirak ne'e, hetan husi intervista ne'ebé JSMP halo ho Dr. Duarte Tilman nu'udar Juiz Administrador Tribunal Distrital Dili.



Funsaun juis nian tuir Konstituisaun, no Lei Majistratura Judisiál, juis hala'o ninia kna'ar ho independente. Juis sira ninia funsaun mak atu aplika lei, administra justisa no ezekuta desizaun, hodi desidi tuir faktus ne'ebé aprezenta iha tribunál. Konsensia juis ninian tenke tuir faktus ne'ebé provadu ka la provadu ne'ebé produs ona iha faze audiénsia julgamentu ba provas ne'ebé Ministériu Públiku no Defensória Públiku aprezenta.

Ezemplo, bainhira akontese krime omisídu iha komunidade nia let. Iha prosesu julgamentu nia laran juis hare katak, akontese duni krime omisídu, juis tenke hare lei ne'ebé mak koalia kona-ba krime omisídu ne'e ninia pena hetan tinan hira. Faktu sira ne'e mak tuir arguidu nia deklarasaun no testemuña sira nia depoimentu, no faktu sira seluk ne'ebé mak aprezenta husi Ministériu Públiku.

Funsaun juis nian iha prosesu julgamentu:

• Aktu preparatóriu

Iha akuzasaun nia apresiasaun, kuandu simu tiha aktus iha tribunál, tuir lei, juis bele kuñese iha altura ne'e, kona-ba kompetensia, legitimidade, nulidade, esepsaun seluk ka kestaun previas (antes) ne'ebé bele impede tribunál atu koñese peritu da kauza.

Wainhira juis hare katak akuzasaun ne'ebé mai husi Ministériu Públiku mak la iha fudamentasaun husi faktu rumo ka direitu ne'ebé mak akuza ba arguidu, juis bele halo depaxu ida katak la simu akuzasaun kuandu konsidera akuzasaun ne'e la refleta ho faktu. Se kuandu simu tiha akuzasaun Ministériu Públiku, Juis bele marka loron ba julgamentu, kuandu hare katak prosessu ne'e tenke halo ona julgamentu. Iha despaxu ne'ebé simu akuzasaun no marka loron ba julgamentu tenke hatama mos Defensor nia nomeasaun.

• Audiénsia

Durante iha audiénsia julgamentu, Juís maka iha kompetensia atu kaer dixiplina no dirije audiénsia, no tenke hola medida adekuada no nesesária para audiénsia bele lao ho normalidade.

Tribunál tenke fo-fatin ba parte sira atu ezerse kontraditóriu, molok atu fó desizaun kona-ba kestaun incidentál no iha produsaun ba prova ne'ebé apresenta ka ezamina iha audiénsia, selae iha nulidade ou lavale.

Audiénsia tenke loke ba publiku, se lao la tuir lei no ne'e la vale. Maibe iha publisidade ba audiénsia ne'e tribunál bele limita, bele taka ba públiku kuandu ba kazu sira ne'ebé hanesan kazu violénsia seksuál liu-liu kazu ne'e involve vítima ho idade menór (labarik). Maske nune'e to'o ona leitura sentensa bele loke fali ba públiku.

Durante iha prosesu audiénsia, funzionáriu judisiál tenke halo akta kona-ba audiénsia no hatama iha akta ne'e. Wainhira audíénsia ida lao ho tempu naruk, juís bele haruka suspende audiénsia no fo tempu ba arguido, vítima no testamuña sira bele deskansa, kuandu audiénsia ne'e la bele halo hotu iha loron ne'ebé hahu audiénsia bele suspende ba tempu ne'ebé mak tribunál determina ona.

• Aktu pre-liminär

Iha oras ne'ebé marka tiha ona atu hahu julgamentu, funzionáriu judisiál, publikamente no ho lian ás, dehan prosessu nia identifikasioun, no bolu ema sira ne'ebé tenke tama iha julgamentu. Ema ruma ne'ebé falta karik, liu tiha minutu 15, sei repete fila fali xamada, halo tuir tiha buat hirak ne'e, funzionáriu judisiál ne'e fó hatene ba juís ne'ebé prezide audiénsia kona-ba se maka iha/marka prezencia no se maka falta.

Kuandu ema ruma ne'ebé tenke tama iha audiénsia ka ema ruma falta karik, lei la fó fatin ba adiamantu, tribunál

deklara audiénsia nakloke no hahu julgamentu. Iha kazu kontrariu, tribunál marka loran seluk atu halo julgamentu, adiamantu ho nia fundamento no mos Ministériu Públiku ho arguido nia posizaun tenke hatama iha akta-adiamantu.

Kuandu arguidu notifika tiha ona, falta, audiénsia tenke adia molok hahú produsaun da prova. *Kuandu arguidu la apresenta justifikasioun kona-ba falta ne'e iha loran 5 nia laran, arguidu tenke selu multa ne'ebé aplika ba nia, no tribunál bele hasai mandadu-detensaun atu halo ka obriga nia hodi mai iha data ne'ebé marka fali.*

Kuandu arguidu mai fó justifikasioun kona-ba nia falta, tenke notifika fali nia atu mai iha data foun ba julgamentu ne'e, ho avizu katak nia falta fali karik, julgamentu sei halo sein ninia prezensa no nia defensor maka sei reprezenta nia iha julgamentu ne'e.

Wainhira arguidu la bele mai audiénsia tanba idade avansada, moras todan ka hela iha estranjeiru, nia bele husu ka autórliza audiénsia bele halo sein ninia prezensa maibé ninia defensor maka sei reprezenta nia iha buat hotuhotu.

Komunikadu Imprensa

Tribunál kondena pena multa ba arguidu kazu violénsia doméstika.

Iha 20 Marsu 2013 Tribunál Distritál Díli fó pena multa \$180 ba arguidu ne'ebé komete violénsia doméstika hasoru nia feen.



Ministériu Públiku akuza katak iha 3 Outubru 2010 arguidu baku no rasta lezada nia fuuk to'o nia monu ba rai. Iha Novemburu 2010 arguidu kontinua komete tan krime hasoru lezada

hanesan baku lezada ho fiu-eletrisidade dala barak iha lezada nia kotuk laran to'o rezulta kanek.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples konjuga ho artigu 35 Lei Kontra Violénsia Doméstika.

"JSMP hanoin katak appropriadu liu atu trata krime ne'e ho maus tratus ba kónjuje tuir artigu 154 Kódigu Penál, tanba iha evidénsia katak arguidu repete krime violénsia doméstika hasoru nia feen," dehan Diretor Ezekutivu JSMP Luis de Oliveira Sampaio.

Iha alegasaun finál Ministériu Públiku deklara katak kazu ne'e konsidera hanesan maus tratus ba konjúje, maibé akuza ho ofensa ba integridade fizika simples tanba laiha kauza grave. Ministériu Públiku husu ba tribunál kondena arguidu ho pena konkreta tinan 1 maibé suspende ba tinan 2.

Iha parte seluk, Defeza dehan katak tanba arguidu konfesa ona, iha konsiliausaun iha família no arguidu iha oan lima, tanba ne'e husu ba tribunál atu kondena arguidu ho pena multa deit.

"JSMP la konkorda katak krime ne'e la grave. Violénsia doméstica sempre iha impaktu boot ba vítima, nia oan sira no ba sosiedade."

Tribunál deside aplika pena multa \$180 – ba loron 180, kada loron \$1. Karik kondenadu la kumpri pena multa sei kondena ba prizaun loron 120 no selu kusta judisiál \$10.

Kazu ne'e rejista iha tribunál ho Númeru Prosesu: 0246/2012/PDDIL. Julgamentu prezide husi juis Dr. Julio Gantes (Juis Internasional), Dr. Vicente Brites reprezenta Ministériu Públiku no arguidu hetan defeza husi Dr. Manuel Exposto husi Eskritóriu Defensória Públiku.

Tribunál Distritál Díli absolve total arguidu GA no HC husi krime burla agravada, pekulatu no abuzu podér

Iha 21 Marsu 2013, Tribunál Distritál Díli hatun akordaun hodi deside fo absolvisaun ba arguidu GA no HC husi krime Burla



Agravadu, Pekulatu no Abuzu Podér relasiona ho utilizasaun

orsamentu durante tempu kampañe partidu ASDT iha tinan 2012.

"JMSM fier katak desizaun ne'e refleta ba faktu sira ne'ebé produz durante julgamentu no konviksaun juizes koletivu sira nian, maibe JSMP enkoraza Ministériu Públiku atu halo rekursu sei Ministériu Públiku fier katak iha irregularidade iha ezekusaun orsamentu ne'e no implikasaun ba orsamentu estadu tanba sira nia pozisaun no atu evita esperensia hanesan iha futuru", dehan Diretor Ezekutivu JSMP, Luis de Oliveira Sampaio.

Tribunál konsidera akuzasaun Ministériu Públiku ba krime sira kona-ba burla agravadu iha artigu 267, krime pekulatu iha artigu 295, no abuzu podér iha artigu 297 Kódigu Penal, hot-hotu la provadu, tanba la prienxe rekijitus iha artigu sira refere.

Tribunál konsidera katak krime burla agravadu, la provadu tanba arguidu sira nia hahalok la hamosu prejuizu ba partidu ASDT atual hodi tama iha situasaun ekónomika difisil.

Tuir-mai tribunál konsidera krime pekulatu la provadu tanba arguidu na'in rua la'os hanesan funzionariu públiku no orsamentu refere la'os utiliza ba privadu hodi halo riku a'an maibe utiliza ba atividade kampañe partidu ASDT.

Ba krime abuzu podér, tribunál mós konsidera la provadu tanba momentu ne'ebá seidauk iha desizaun tranzito em julgadu husi Tribunál Rekursu relasiona ho estrutura foun ba posizaun husi Sekretariu Jerál no Prezidente ASDT. Nune'é arguidu na'in rua sei asumi kargu hanesan Sekretariu Jerál partidu ASDT no Prezidente ASDT hodi ezekuta orsamentu ba atividade kampañe partidu ADST.

Aliende ne'e bazeia mos ba lei internal ASDT ne'ebé defini katak wainhira prezidente partidu mate, automatikamente nia vicemak asumi direitamente kargu nu'udar prezidente provizoriu partidu nian.

Relasiona ho desizaun ne'e, Ministériu Públiku bazeia ba artigu 300 Kódigu Prosesu Penal iha loran 15 nia laran depois simu desizaun eskrita, sei hasae rekursu ba Tribunál Rekursu.